

Aruba Heart Foundation ta organisa nan di tres Red Event

Problema di curason ta hopi grandi cerca ser femenino

ORANJESTAD - Aruba Heart Foundation (AHF) ta organisa nan di tres Red Event. E evento aki ta uno masha conoci na Merca y rond Caribe, y e lo tuma lugar dia 19 di september, 2015 na Alhambra Ballroom di 9'or di mainta pa 2'or di merdia.

Sra. Dilma Daal di AHF a declara na Bon Dia Aruba cu aunke nan no tin un estadística na man, pero como fundacion nan ta na haltura cu e victimanan di problema di curason ta grandi particularmente cerca e ser femenino. E ta un di e causa mas grandi di mortalidad na Aruba. Aunke tin bialha ta wordo bisa cu ta cancer, pero esun cu ta sobrevivi ta hopi mas halto den casonan di cancer cu esun di curason.

Conscientisacion

Actualmente personanan relativamente jong ta hayando complicacion di curason. E tin di haber cu situacion di trabou, famia, stress, etc. Esaki tin un efecto directo riba presion y dor di presion nan por haya problema cardiovascular. "E bida ta mas agita cu antes", Sra. Daal a bisa.

Pero e ta indica cu general-

mente curason no ta duna un señal vooral si e persona no ta conoce e sintomanan. P'esey nan organisando e evento aki caminda nan lo trece oradonan di diferente parti. Nan ta specialistanan di Bucaramanga (Colombia), Merca y di Aruba mes. Dor di nan charla nan ta bay conscientisa nos hendenan.

"Semper e ta un conscientisacion locual nos ta haci", el a bisa na Bon Dia Aruba. E topico lo ta varia y otro luna nan lo wordo anuncia. E ta haya relevante pa haci énfasis riba conscientisacion pa hende pone mas atencion riba nan sistema di alimentacion, colesterol, presion halto, etc. Por ta e persona no sa cu e ta sufrí di colesterol of presion halto, y tin bialha nan ta sinti algun molester sin sa cu ta esey, te ora cu ta wordo sorprende cu un ataca di curason.

"Pa e motibo aki e enfoque ta hopi riba conscientisacion. Conoce bo mes, wak bo cifranan, wak e cifra di bo presion, colesterol... Esey ta e conscientisacion pa tur hende conoce nan culpa", Sra. Daal a declara.

Hende muhe y curason



Sra. Daal a indica cu nan ta pone énfase riba hende muhe, ya cu e sintomanan ta totalmente diferente cu hende homber. Tin bialha e señal no ta wordo interpreta debidamente y e ta wordo relaciona cu otro sorto di dolor te hasta cu stress, pero e dokternan no ta bay di bialha na curason. "Nan kiermen cu e hende muhe no ta sufrí di curason. P'esey mes nos kier enfoca riba kico e señalnan por ta. Con pa bo conoce bo

mes...", el a bisa.

Si bo ta un persona cu ta sufrí di presion halto e ta un riesgo masha halto, mescos cu colesterol, humamento, etc. Tur e puntonan aki nan lo elabora riba dje durante e evento menciona. E oradonan ta dokternan specialisa cu a yega di brinda nan servicionan na e pashentnan di curason na Aruba. Lo tin un dokter cu lo bin di Bucaramanga cu ta e ciudad Colombiano caminda regularmente ta wordo manda nos pashentnan di curason.

E topico lo ta relaciona cu hende muhe y problema di curason. Pues e ta un topico cu lo hala hopi atencion. "Dor cu nos ta traha caminda cu nos pashentnan ta wordo manda, e pashentnan of invitadonan kier bin wak si nan ta topa nan dokter. Esey ta bunita den tur evento grandi", el a bisa. Aunke esaki lo ta un tiki mas chikito, pa mas of menos 150 hende y enfoca riba ser femenino.

"Red Event"

Atrobe nan diseño di "Red Event" ta un hende muhe completamente bou stress. Pakico? Pasobra nos hende muhenan ta ehecuto diferente trabou pareu ya sea como mama, ehecutivo, yiu, casa, wela, tanta, madrina, chauffeur, educador, consejera y mucho mas. E idea tras di e evento aki ta pa ripiti y sigui ripiti con pa biba mas saludabel pa asina nos por baha e cantidad di hendenan afecta cu malesa di curason.

Tur hende interesa mester ta

na ora pa cumpra nan ticket ya cu tur bialha nan ta completamente bendi. Aunke e ta dedica na hende muhe esaki no ta kita cu si e casa kier compaña e señora, ya cu e señora ta un pashent di curason caba, esaki no ta problema.

Sra. Daal a describi e evento aki como un "mainta hopi placentero y cu hopi informacion importante y valioso pa e ser femenino". E hecho cu e evento aki ta pone énfase riba hende muhe esaki no kiermen cu e fundacion aki ta negligisha e ser masculino. El a declara cu tur aña nan ta cambia e tipo di evento aki. Tin aña nan ta bin cu un conferencia general caminda nan ta invita mas oradonan pa papia ariba diferente topiconan pa tanto hende homber como pa hende muhe.

E entrada lo ta 75 florin y dress-code ta pa tur hende bin bisti na cora of cu un toke di cora. Ticketnan lo ta hopi limita y lo ta na benta entrante fin di juni proximo, y lo ta obtenibel cerca tur miembro di directiva. Tambe e persona interesa por yama na telefon 582-4278 of 582 HART, unda por laga bo nomber y telefon y asina nan haya un chens nan lo debilbe e yamada. Lo bay tin koffie, te y juicenan. Tambe lo tin sandwich, salad plates y dessert. E idioma di e simposio lo bay ta Ingles pero ora di haci pregunta bo por haci'e na Papiamentu tambe. Lo tin regalitonan pa tur presente y na final lo tin premionan pa esunnan mihó bisti. Clausura lo ta cu un Red Champagne. □

